

Amasa-Villabona... Bai iragan ona!

# LUMI

## 36ko Gerra

19 zbk.

2006ko uztailaren 2a



Frontean borrokatu zuen hainbat mutil atsedean hartzen.

**36**ko Gerra etorri zenean, *Lumaneko* gazteenek, ez zekiten ezer politikaz eta gerraz ere, ezer gutxi. Eskolan ikasi zuten Independentziaren gerra esaterako, eta gudua, bi alderdiren arteko borroka zela zekiten juxtu-juxtu. Euren azalean biziko zituzten gerora gerraren gogortasuna eta horren ondorio mingarriak; senide maitatuak galtzea, espetxeratzeak, ile-mozteak, erbestea, miseria, ezinikusiak... 36ko Gerrak iraun zuen bitartean, beldurra gailendu

zen izkina guztietan. Orduz gero urte asko igaro den arren, oraindik ere ez dira guztiz sendatu barruan gordetako zauriak. Bildumako gairik potoloanean, gerra garaiko Amasari eta Villabonari erreparatuko diegu eta beste kontu askoren artean, inolako errurik gabe fusilatu zituzten hainbat herritarren izenak ekarriko ditugu gogora. Urte luzetan isilpean gorde den gai labainkorra dela badakigu eta, ez genuke inor mindu nahi baina, gertaera latzegiak izan ziren aipamenik gabe uzteko.

## GERRA AURREKO TESTUINGURU POLITIKOA

Villabonan, gainerako herrietan bezalaxe, alderdi ezberdinetako egoitzak zeuden. Errepublikarrena, UGTrena, Sozialistena eta CNTrena, ezkerrekoen aldetik. Eta Batzokia, Emakumeen Zentrua edo 'Círculo Carlista' eskubikoaren baitan. Aipatu alderdi politikoetako kideak euren egoitzetan biltzen ziren aisia igarotzera; basoerdiak hartuz, kartetan jolastuz... "Egun Behar Zana elkarteak dagoen horretan zegoen Batzokia eta besteak beste, antzerki emanaldiak egiten ziren euskaraz. Dantza taldea ere bazen, neskena nahiz mutilena. Andoaingo Pello Ugalde zen dantza irakaslea, Martin Ugaldere aita", azaldu du Jabier Berasaluzek. "Círculo Carlista'ko kideak,

Barbe ferreteriaren gainean elkartzen ziren, Kale Berrian. Zinea ematen zuten han; zine mutua, mendebaldeko pelikulak, bakeroenak...". Emakume nazionalistek ere bazuten euren txokoa, "Lertxundi etxearen lehen pisuan biltzen ziren. Egungo Kultura Etxearen pare-parean". Errepublikarrek bi egoitza izan zituzten, "Kale Nagusian, Barbe drogeriaren goran biltzen ziren lehenik. Gerora Arregineko etxean izan zuten txokoa, lehen solairuan". Gainerako alderdien egoitzak ere Kale Nagusian zehar zeuden banatuta. Urtero aldarrikapen jaia egiten zuen alderdi bakoitzak, "errepublikarrek apirilaren 14an ospatzen zuten beren eguna. Nazionalistek, Aberri eguna Pazko



**Jabier Berasaluze**

*"Egun Behar Zana elkarteak dagoen horretan zegoen Batzokia eta besteak beste, antzerki emanaldiak egiten ziren euskaraz"*

igandean. Agian, maiatzaren 1eko Langileen eguna zen ospakizunik garrantzitsuenak. Bazkari eta bileren ondoren, *Internazionala* kantua abesten zen". Jabier Berasaluzek Villabona herri baketsua zela gogoratzen du, "herritarrek, alderdi ezberdinetakoak izanda ere, tratu ona zuten elkarren artean; elkar laguntzen zuten".

36ko Gerra lehertu zenean, ordea, bereizi egin ziren alderdi politiko guztiak. Errepublikaren alde egin zuten batzuek, Francoren alde besteek. Abertzaleak errepublikarrek elkartu ziren, Francorekin karlistak. Jakina, liskar handiak sortu ziren alderdien artean eta jende errugabe askok gogotik ordaindu zuen. Francoren gidaritzapean, espetxeak nahiz kontzentrazio esparruak lepo bete ziren, epaiketarik gabeko fusilaketei bidea ireki zitzaizen... Modu horretan abiatu zen horrenbeste urte iraungo zuen diktadura. Goazen, bada, poliki-poliki aurrera.



Villabonako errepublikarrak, 1934 urteko Errepublika egunean, plazan.

## NAZIONALISTEN MITINAK AMASAKO VILLA ALFONSINAN

36ko Gerra iritsi aurretik, mutil eta neska koxkorrak ziren *Lumaneko* kideak, "orduaz ez ginen jabetzen zer zetorki-

gun!". Seina urte zituzten taldeko gazteek: Maria Luisak eta Maritxu Mendizabalek, hogeitau urte helduenak: Isabelek.

"Gerra hasi aurretik, nazionalistak botoak botatzen gogoratzen ditut", ekin dio Maritxu Gonzalezek. "Orduan galdu

zuen hanka Zufiriak". "Bai, bai; garai hartako autoen estriboan zihuan Zufiria, autoaren kanpoaldean. Beste kotxe batek parez jo eta hanka galdu zuen, hara!", gehitu du Pakok. Gerra hasi aurretik Amasan mitinak egiten zituztela ere aipatu du sarreran Maritxuk, "Frantsesanea moduan ezagutzen den etxearen kanpoaldean, Villa Alfonsinan, mitinak egiten zituzten nazionalistek. Ahizpari entzun

izan nion nola, besteren artean, gure osaba Hilario Odriozola, Esteban Arrieta eta Julian Otegi amasarrek hartzen zuten parte. Ikurriña eta guzti joaten omen zen azken hori. Haietako bat baino gehiagori frontera joatea egokitu zitzaion gero. Txapela gorria jantzi behar izan zuen gure osabak ere, hilko ote zuten beldurrez. Balak jo eta hil egin zen baina, bizirik zegoen bezalaxe ekarri zutela esaten zen".



**Maritxu Gonzalez**

*"Frantsesanea moduan ezagutzen den etxearen kanpoaldean, Villa Alfonsinan, mitinak egiten zituzten nazionalistek"*

## GERRAREN ETORRERA ORDUKO HAUR ETA GAZTETXOEN BEGIETATIK

Villabonan, 1936ko abuztuaren 16an altxatu ziren militarrek, "Amabirjina bigarrenean ailegatu ziren herrira, igandea zen. Orduan ez ziren bertan geratu, Andoain aldera pasa ziren". Aurretik, ordea, izan zen beste gertaerarik herrian, "militarrei herrirako sarrera galarazteko, abuztuaren 13an, ostegun gauean, Zubimusu zubia bota egin zuten gorriek. Oraindik ere nabari da nola berritu zuten gerora zubia. Villabona aldera, hiru zulo egin zituzten zubiari, hiru dinamita jarri baitzituzten". Ekintza hark eragina izan zuen herritarrengan, "hutsik geratu zen herria orduan; ez zuri eta ez gorri. Jaiean sartu ziren Villabonara; bai, bai, abuztuaren 16an", azaldu du Pellok inolako zalantzarik egin gabe. Gerra Amasara nola iritsi zen gogoratu du Roberto Garatek, "Frankistak Belabieta aldetik Amasara sartu zirenean, metrailetakin egin zuten eraso. Hainbat balek, elizako dorrea jo zuen. Meza nagusia ematen ari ziren elizan eta herritarren batek azaldu zion egoera apaizari. Segidan meza eten eta lasterka babes bila abiatu ziren gerturatutako guztiak. On Jose Baztarricka apaiza, hilko ote zuten beldurrez, Artatoloxa baserrira abiatu zen. Esku zabalik hartu zuten han. Muttegiako guardarekin hitz egin eta bi egunez egin zuen lo hango txabolana, soldaduak Donostia aldera abiatu ziren arte". Amasar eta villabonatar asko,



**Pello Iribar**

*"Frankistei herrirako sarrera galarazteko, abuztuaren 13an, ostegun gauean, Zubimusu zubia bota egin zuten gorriek"*

inguruko herrietara joan zen babes bila, gutxiagok erabaki zuen herrian bertan geratzea. Gaurko hizlariak, egoera zail haren aurrean hartu zuten erabakia azaldu digute. "Gure aita Portuneko nagusiaren txoferra zen. Gerra hasi zenean, alde egin zuen eta ez genuen sekula berriro ikusi. Ama geratu zen anaia eta biokin. Hementxe, Villabonan bertan", gogoratu du Pakitak. Pelloren familiak ere erabaki berbera hartu zuen: Villabonan geratu ziren. Baita beraztarrek ere, "etxean geratu ginen. Ez ginen inora joan". Berasaluzetarrek ere berdin, "ama, arreba eta hirurok geratu ginen etxean. Aitak ihes egin behar izan zuen, errepublikarra zelako". Egiñotarrak, berriz, Villabona utzi eta Zizurkilera joan ziren, "gu Zizurkileraino joan ginen familiako batzuen baserrira. Astebete igaro ondoren, 'goazen etxera!' esan eta itzuli egin ginen". Familia batek baino gehiagok egin zuen ihes Zizurkilera, tar-

tean etxeniketarrek. "Gu ere Zizurkilera joan ginen, Zapei baserrira. Hamabost bat egun igaro eta berriz ere etxera". Gerra hasi zenean, seguruagoa ote zen Zizurkil Villabona baino? "Egia esan, igual-iguala. Donostiako militarren kuarteletik ekarritako kanoiak jarri zituzten Amasan eta Fraisoron. Botatzen zituztenean, beldurra ematen zuten *pum* eta *pum* hotsek. Mahaia eta guzti mugitzen ziren kanoien dardarekin. Ahal zuenak, martxa egin zuten badaezpada". Gertutik gertura alde egiteko erabakia beldurra uxatu baino gehiago, baretzeko modua zen. Babesa aurkitzeko nahia. Maritxu Gonzalez eta bere familia Aiara joan ziren, "aitaren jaiotetxera alde egin genuen guk. Hilabete inguru egin genuen han. Gero, aita joan egin zen eta gu etxera!". Etxera itzulita-koan, ordea, ez zen amesgaiztoa bukatu inondik inora. "Etxera itzuli eta gauza asko falta. Izugarritzko lapurretak egin zituzten herrian. Lapurreta handiena pereztarren etxean egin zutela esaten zen. Koltxoiak, arropak..., denetik eraman zuten". Villabonatik alde egin ez zutenek, Tolosa eta inguruko herrietatik jendea nola zetorren ikusi zuten, "Tolosaldetik ihesi zihuan jende asko eta asko pasa zen Villabonatik. Maletak, armairuak..., denetik karroan hartuta. Donostia edo Orrio aldera zihozten gehienak. Handik, ahal zuenak Bilbora iritsi nahi zuten".

## BONBARDAKETARIK EZ, BAINA IZUA HEZURRETARAINO SARTUTA

Haur eta gaztetxoak gerraren etorreraz gehiegi jabetzen ez baziren ere, izua barru-barruraino sartuta zegoen herritarren artean, "makila puskak hartu eta traineruetara jolasten ari ginen lagunak, orain Errota auzoa dagoen horretan. Bat-ba-

tean, *erreketek datoz eta zoazte etxera! Zoazte etxera!!!*, oihukatuz ziguten txapelgorriak ikusi zituztenen batzuk. Abiatu ginen korrika etxera eta, nor izango? Mikeleteak! Pentsa zertarainokoa zen beldurra", gogoratu du Anjelek.

Hizlariak azaldu dutenez, Amasan nahiz Villabonan, apenas izan zen bonbardaketarik. "Amasan bai, elizaren ondora bonba bat bota zuten airez. Ez zuten eliza harrapatu baina zulo ederra utzi zuten lurtean. Gorriak elizaren aur-



Anjel Egiño

"Erreketek datoz eta zoazte etxera! Zoazte etxera!!!, oihukatu ziguten txapel-gorriak ikusi zituztenen batzuk"

kakoak zirenez, eliza ondoratu nahiko zuten baina, ez zuten lortu. Apaiz as-

## AMASAR ETA VILLABONATAR FUSILATUAK GOGOAN

Gerra anker haren ondorio zentzugabe eta latzenak fusilaketak izan ziren, zalantzarik gabe. "Fusilatu zituzten guztien bekatua errepublikaren aldekoak izatea zen. Aberzaleak, euskaltzaleak... Horixe guzti-guztia. Gizajoak! Inolako errurik gabe hil zituzten. Zerrendaren bat egongo zen eta zuzen betetzen zen han agindutakoa. Errepublikar askok eta askok ihes egin zuten. Eskerrak! Gupidarik gabe akabatu-ko baitzituzten bestela. Beste askok eta askok frankisten bandoan hartu zuten parte gerran. Zer erremedio bizirik jarraitu nahi bazuten!"

Zerrenda luzea osatu dugu fusilatuen izenekin. Hizlariak saiatu dira saiatu, baina ez dute beste izenik gogoratzerik lortu. Hala ere, seguru diote herritar gehiagori kendu zietela bizia. "Amasan eta Villabonan, hamabostetik gora izan ziren fusilatutakoak". Inork beste izenik edo daturik erantsi nahiko balu, eskertuko genuke gurekin harremanetan jartzea.

### JOSE JOAKIN ARIN OIARTZABAL:

Amasako Garmendi Txiki baserrikoa. Arrasateko artzapezpikua zen. "Arrasaten elizkizuna ematera abiatu zen batean; *Grite usted Viva España*, esan zioten behin eta berriz. Halako batean esan omen zuten eta; *grite usted más alto*, beste hiru bider. Herriko jendea dena harriritua zegoen. Herriko jendea dena harriritua zegoen. *Ahora grite usted abajo el clero vasco*, eta osabak, *eso jamás*, erantzun zuten", Rosario Garinek ondo gogoan duenez. "Horrela ibili eta gero, hiru apaiz hil zituzten batera. Jendea ez konturatzeagatik, taxian eraman zituzten Ondarretako espetxeraino. Han astebate eskas eginda, goizeko bostetan kartzelatik atera eta Oiartzunen fusilatu zituzten, 1936ko urriaren 25ean, hilerriaren kanpoko paretaren kontra". Haien gorpuak aurkitzeko lagungarri izan zen

kok, kalera ateratakoan, sotana kendu egiten zuten bere burua babestuz, nor zen agerian gera ez zedin". Solaskideek inguruko bonbardaketarik gogorrenak Donostian izan zirela aipatu dute eta villabonatar bat baino gehiago egokitu zela hantxe, erdi-erdian. "Villabonako Paka Arratibelen bi alaba hil ziren Donostiako bonbardaketa haietakoren batean. Emakume gaixoa! Senarra ere desagertu egin zitzaion gerran". Villabonako beste emakume batek ere Donos-

tiako bonbardaketen ondorio larriak jasan zituen, "Maria Leturiondok hanka galdu zuten". Amasan eta Villabonan aurrez aipatu ditugun kanoien burrunba entzuten zen tarteka; hots beldurgarria. Amasako plazan jarri zuten kanoietako bat. Plaza inguruko baserriak hutsik geratu ziren; Seroetxe, Amallu, Arantzalde... Haietako hogei bat lagun, emakumeak eta umeak bereziki, Pesus baserriaren babestu ziren kanoien burrunbatik ihesi.

Laguntzeko eskatu zion, baina presaka zebilela erantzun zion hark; tranbia hartu beharra zeukala. Aita bisitatzera joaten ginen gu tarteka espetxera, hauxe izan zen jaso genuen azken erantzuna. *Ya han salido libres, andarán de juerga*. Gerora jakin genuen ordurako Beran fusilatu egin zituztela. Azaroaren 15ean hil zituzten eta hantxe lurperatu. Kasualitatea, Beran jaioa zen gure aita".

### MAXIMINO EROSTARBE BAZTARRIKA:

Portu papertegiko langilea. Perretxikuak biltzea eta ehiza zituen gustuko. Beran fusilatu zuten 1936ko azaroaren 15ean. 39 urte zituen. (*Lumane* aldizkariko Anjel Egiñoren osaba).

### ZIPRIANO CARDENAL:

Txistularia. Batzokian txistua jotzen zuelako fusilatu zuten Beran, azaroaren 15ean. 18 urte zituen.

### JOXE MANUEL GARMENDIA URKOLA,

‘PORTOTXA’:

Kale Nagusian bizi zen. Obretan egiten zuten lan. 1936ko urriaren 1ean fusilatu zuten. 47 urte zituen.

### DANIEL ARRILLAGA TOLOSA:

Portu papertegiko langilea. Atabalaria. Bost seme utzi zituen. Azaroaren 15ean fusilatu zuten Beran. 40 urte zituen.

### VALERIANO SAIJAR ARTEAGA:

Gerra baino lehen Villabonako alkate izan zen. Zarautzen hil zuten 1936ko urriaren 9an. "Tiroa bota eta lurrera erori omen zen

zaurituta. Fusila eskuetan zuenari; *Apunta bien, traidor* esan omen zion lurretik". 72 urte zituen.

### JOSE INAZIO GARMENDIA:

Portu papertegiko langilea.

### JOSE INAZIO ETXEZARRETA:

Amasako Izarre baserrikoa. Alegian fusilatu zuten eta bertan lurperatu. "Diru kontuak tarteko, gerraren izenean, bengantzaz hil ote zuten esaten da".

### ASINTXIO ARRETXE:

Amasako Xandra baserrikoa. "Militarrek eramango ote zuten beldurrez, ezker eskuko

behatzak moztu zituen aizkora batekin. Soldadu eraman zuten gero. Han, kangrenak jo ote zuten-edo, ospitalera eraman zuten. Bertako mojek eskutitz bat bidali zuten etxera, senideez asko gogoratzen zela esanez". Zalantza egiten da haren heriotzaren inguruan; ospitalean bertan hil zitekeen edo fusilatu egin ote zuten ere aipatu da.

### LUKAS LASA:

Portu papertegiko nagusiaren txoferra. Semea eta alaba zituen. "Lantegiko nagusiekin joan zen Bilbora. Denborak aurrera egin ahala, hark etxera etorri nahi zuten emazte eta seme-alabarengana. Itzulerako bidea hartu zuenean, harrapatu eta hil egin zuten. Ez dakigu garbi nork". (*Lumane* aldizkariko Pakita Lasaren aita).

Amasan eta Villabonan oihartzun gehien

sortu zuten hilketa Valeriano Saisar Arteagarena izan zen. "72 urteko agurea apaiz militantea zen. Hurren zegoela, Saisarrek apaiz faxista baten bisita izan zuten baina ez zuten onartu. *Bizitza osoan sinetsi egin dut eta kristau erlijioa praktikatu. Orain ez dut sinesten jada. Ez dut praktikatu nahi*" aitortu zuten.

Gainerakoan, gerran soldadu ibili ziren herritar gazteak ezin zenba daitezke. Hildakoak asko izan ziren. Asaltoren batean hil zenik ere izan zen. "Naparrak sartu baino lehenago herritik eraman egin zituzten hainbat karlista. Anarkistek Rafael Garaialde karlista villabonatarra hil egin zuten Bilboko kartzelan asaltoa egin zutenean. Cuevas maixua, Moises Barbe eta Jose Castro karlistak preso egon ziren, baina bueltan etorri ziren haiek. Kartzelatik etorri eta gero joan ziren frontera".



Jose Joakin Arin

Juan Etxenike

Zipriano Cardenal

Daniel Arrillaga

Valeriano Saisar

Jose Inazio Etxezarreta

Asintxio Arretxe

## EMAKUMEEI BURUA ZURI-ZURI

Gerrak ezberdin jokatu zuten emakume nahiz gizonekin. Errepublika defendatzen zuten gizon asko eta asko fusilatu egin bazituzten, ez zuten gauza bera egin emakumeekin. Emakumeei, oro har, bizia errespetatu egin zieten arren, nahikoa sufrimendu ez eta, lotsarazi egiten zituzten. Gainerako herrietan bezalaxe, Villabonan ilea sustraitik moztu zieten emakumeak ez

ziren bat eta bi izan. "Nafarroatik zetozen tropek Iru-aldeta zaharrean jarri zuten kuartela. Egunero-egunero hara sinatzera joatera behartzen zituzten herriko hainbat emakume. Villabonan lauri moztu zieten ilea, buru zuri-zuri uzteraino. Petra Bidaor eta Ebarista Sasiabarrena izan ziren haietako bi. Garai hartan umiliazio handia zen hori". Ilea moztea gutxi ez bazen, herrian

zehir bueltaka ibiltzera behartzen zituzten. "Bizkarrean espainiar bandera hartu eta herria zeharkatuz, *Viva España* oihukatu arazten zieten; egunero-egunero, bai". Errepublikaren aurka zeuden villabonatar emakumeek 'laguntzen' zieten herriagoitik behera zeharkatzen. "Herritarrak herritarren kontra. Horixe izan zen gerra haren alderdirik ilunena", onartu dute aho batez.

## ABERTZALEAK UDALETIK KANPO

Gerra lehertu zenean, Federiko Urdapilleta nazionalista zegoen alkate. Baina herri guztietan bezala, hemen ere abertzaleek boterea galdu zuten, "alkate nahiz zinegotzi nazionalistek alde egin behar izan zuten, beldurraren beldurrez". Gerra ondorenean, Juan Barbe izan zen Franco garaiko lehen alkatea. Hizlariak, aldaketa nabarmena izan zela adierazi dute, "goitik

behera aldatu ziren ohiturak. Diktadura ezarri zen. Lehen ikurriñak zeuden tokietan, espainiar banderak jarri arazi zituzten. Hasi udaletxetik eta herritarren etxeetako balkoi eta leihoetaraino. Beharko jarri, edozein bengantza egiten zuten bestela". Pisuzko beste aldaketa nagusi bat ere ezarri zuten; "herritik atera nahi zuenak, igarobidea edo 'salvoconducto' a behar

zuten, Udaleko arduradunen bi sinadura biltzen zituena. Bestela ezin zen Villabonatik kanpora atera. Sinatzen zuten, bai, baina udaletxera joan behar zen sinadura bila". Herri bat bereganatzen zuten bakoitzean, herri guztian zabaltzen zen berria: "Avila hartu bazuten, 'la toma de Avila' ospatzeko kanpai-errepika izaten zen. Gu ere askotan bidaltzen gintuzten eskolatik

elizara kanpaiak jotzera". Herriko musika bandak kalejira egin behar izaten zuen 'toma' horien berri zabaltzeko. Musika banda eta etxeferoak izaten ziren Bilbo, Madril, Bartzelona edo beste hiriren bat hartzen zuten bakoitzean. "Herritarrek

bandarekin kalejiran parte hartzera behartzen gintuzten. Guk pasa genituenak pasa arren, *danba-danba* aldaba joka etortzen zitzaizkigun etxera, *que salgan, que salgan*, oihukatuz. Gu ez ginen ateratzen, noski!", azaldu du zorrotz Pakok. 'Flechas y Pel-

yos' falangisten kalejirak ere ikus zitezkeen herrian. "Kaleko edozein mutil koskor hartu eta txapela gorria jantzita kalejiran ibiltzen zituzten. 'Flechas' taldea falangistek osatzen zuten. Erreketeak ziren 'Pelayos' taldeko kideak".

## INDAR ARMATUAK HERRIAN

Gerrak probintziaz probintzia egin zuen aurrera. Euskal Herria 'Campaña del norte' saioaren baitan hartu zuten mendean eta Asturias arte borrokatu zuten soldaduek. Hortik aurrera Ebroko gudua edo Madrilgoa etorri ziren, bestak beste. 'Campaña del norte' bukatu zenean beraz, soldaduei atsedean eman zieten buruek. "Batailoi bat Villabonara etorri zen deskantsu hartzera, bostehunen bat soldadu izango ziren. Valladolid-koak asko. Gosea ekarri zuten eta zorri galantak ere bai". Berrogei egun inguru igaro zituzten villabonatarren etxetan. "Ilaran jarri eta etxe bakoitzean binaka banatzen zituzten; bi hemen, beste bi hor, han beste bi...". Gazte haietako asko eta askori ere, nahiz eta gogoz kontra ibili, gerran parte hartu beste erremediorik ez zitzaien geratu. "Gure etxean egon zirenak



Isabel Beraza

"Gure etxean egon ziren soldaduak oso jatorrak ziren."

oso jatorrak ziren", esan dute Anjelek eta Isabelek. Maritxuk gogoan du haien etxean leku gutxi zegoenez, bakarra egon zela. "Villabonako Barriolanean geunden orduan. Leku gutxi genuenez, soldadu bakarra bidali ziguten. Gure etxean bat eta goran bestea. Pepe eta Isidro, Valladolid-ko anaiak. Gure aitak ez zekien gaztelaniaz hitz egiten eta *ahora la comiendo y luego durmiendo*, esaten zion *orain afaldu eta lotara*,

esan nahi zionean. Permisoa hartuta etxera joan zirenean, bi panpinekin itzuli ziren bueltan; bizilagunarentzat bat, niretzat bestea". Villabonan egon ziren bitartean, diberti zitezten, astean bi edo hiru txandatan musika emanaldia eskaintzen zien bandak. Hamaiketakoak ematen zitzaizkien, desfileak egiten zituzten... "Villabonan atsedean hartu zuten soldaduetatik bat baino gehiago geratu zen maiteminduta bertan bizitzen". Maitasuna gerraren erdian..., bizitzaren paradoxak! "Bai, bai; etxeren batzuetako neskekin maiteminduta, batailoi hartako hiru soldadu Villabonan geratu ziren ezkontuta". Batailoi hark Ebrorako bidea hartu zuen gero, "gehiengoak hantxe hartu omen zuen azken arnasa. Haietako oso gutxi itzuli zen etxera, hori esaten zen", azaldu dute hizlariak.

## 36KO GERRAREN OIHARTZUNAK UDAL-AGIRITEGIAN

Gerrak iraun zuen urteetako berriak bildu asmoz, Villabonako Udal-agiritegira jo dugu. Urte haietako batzarretan hartutako hainbat erabaki jasota daude aktetan. Eta akta horiek, larruz koadernatutako liburukote marduletan daude bilduta. Teknologia berrien laguntzarik gabe, garaiko kaligrafiaz, idazkariak banaka-banaka idatzi zituen eskuz. Egia esan, ez dugu gerraren inguruko aipamen berezirik aurkitu idatzietan. Baina bai gerra hasi aurreko udalbatza osatzen zuten herritar taldearen zerrenda. Esan dugunez,

1936ko abuztura arte, Federiko Urdapilleta zen herriko alkate. Jose Inazio Iñurrita, Jose Sorregieta, Jose Darras, Valeriano Saizar eta Nestor Arregi ziren zinegotziak. 1936ko abuztuaren 18ko aktatik aurrera ordea, goitik behera aldatu zen zerrenda. Ordura arte Errepublikak babesten zuen gobernuara eraitsi eta Juan Barbek hartu zuenaginte nagusia; orduz gero bera izan baitzen alkate. Jose Zugasti, Desiderio Subijana, Justo Ezeiza, Bautista Zufiria eta Tomas Iraola herritarrek osatu zuten zinegotzi taldea.

Gainerakoan, begia jo digu agiritegian aurkitu dugun beste paper sorta batek ere. "Cobro de haberes y demas de los soldados" izenburupean, frentean hil ziren soldadu askoren familiartekoei hilean behin ematen zitzairen laguntza ekonomikoaren berri jasotzen da. Euren borondatez edo behartuta, Francoren alde borrokatu eta bizia galdu zuten mutil gazteen senideei, hilero 173.05 pezeta inguru ematen zitzairen. Jakina, Errepublikaren alde bizia galdu zutenen senideek, ez zuten zentimorik ere ikusi.

## ROBERTO, FRONTEAN BORROKAN

Frontean borroka egitea egokitu zitzaion Roberto Garate amasarriari. 18 urte bete berritan eraman zuten. "Logroñora eraman ninduten lehenengo. Fusila hartu eta

egun batean erakutsi ziguten nola manejatatu. Handik segidan borrokara. Guztira 13 belaunaldi egon ginen". 1928 eta 1940 urteetan jaio ziren mutil gehienek ez zuten

beste aukerarik izan, "Villabonatik boluntarioren batzuk joan ziren baina gehienak, behartuta joan ginen. Nola ukatuko genuen ba? Joaten ez baginen *antipatrio-*



Roberto Garate

"Logroñora eraman ninduten lehenengo. Fusila hartu eta egun batean erakutsi ziguten nola manejatatu"

*tikozat* salatu eta bazterren batean hilko gintuzten. Boluntario joan zirenak erreketekak ziren. Gu militar behartuak. Bagenuen nahikoa lan. 18-19 urterekin beldurrik batere ez baina, gerra noiz bukatu eta etxera itzultzeko zain geunden". Logroñotik Castellon aldera eraman zituzten eta han bi taldetan bereizi ziren. Tarragona aldera batzuk, Katalunia aldera besteak. "Hamabi batailoi ginen guztira. Gu *Cuarto de Bailén* batailoiko kideak ginen, Camilo Alonso zen gure jenerala eta beti aurrera egiteko prest zegoen. Adunako Metxala baserriko semea eta biok konpainia berean egokitu ginen. *A tiro limpio* ibili ginen. Gogoratzen naiz Cabales mendikatean 2000 metrotik gora ibili ginela. Goiko muturrean geunden. Elurretan, lotarako lekua egin behar izaten genuen gauz. Egunez, berriz, elurretan babesten ginen arerioengandik. Oraindik ere aurkituko nuke leku hura". Robertok batailoi hartan hildako askorik izan ez zela azaldu du, "zaurituak bai, asko. Hildakoak gutxi. Castellonen laranjondoetatik barrena gindoazela ia harrapatu egin gintuzten. Juxtu bada ere, salbu atera ginen". Robertok gaztetasun txarra tokatu zitzaizela aipatu du, "ni 1937an eraman ninduten Espainiako gerrara. 1939 urtean itzuli nintzen etxera. Eta 39an zer eta alemaniarrek hasi ziren. Beste hiru urte pasa

genituen gosetuta kuartelean. Ogirik ere ez ziguten ematen nazkante haiek. Ia sei urte gerran, soldadu zela edo kuartelean zela. Gero alemaniarrek artoa, patata..., dena kentzen ziguten etxetik. Taloei esker

bizi gara". Gerra, gosea nahiz ezinikusia ezagutu zituztela esan du Robertok. "Gizakiaren alderdirik oker-okerrena, zalantzarik gabe, inbidia da. Gerra garaian zeresan handia izan zuen inbidia".



Frentean mutilei eskainitako meza.



Frontean borrokatu behar izan zuten hainbat gizonen kinto-bazkaria. Tartean dira amasar eta villabonatarak. Besteak beste, Esteban Arin, Remigio Ayestaran, Joxe Migel Amenabar, Joakin Aiausti, Jose Urteaga, Gregorio Ezeiza, Juanito Ormazabal eta Jose Antonio Alustiza

## GERRAREN ZENTZUGABEKERIA




Pako Etxenike

"Gu bezalakooi, herriko askok eta askok ez ziguten kasurik egiten kalean ikusita: horiei aita hil diete eta, badaezpada, begiratu ere ez!"

Lehen pertsona gerra bizitzea egokitu zitzairen haur eta gazte haiek iritzi bera dute gerraren inguruan. "Oso gogorra izan zen gerra, txarra benetan. Ikaragarriak egin zituzten. Miseria eta kalamidadea nonahi. Sufrimendua nagusitu zen etxe gehienetan". Hildakoak, gosea, ihesaldiak..., beldurrak gaina hartu zuen. "Anaien arteko gerra izan zen. Hori bai kontu tristea. Etxe askotan, fronte batean anaia bat eta beste aldean bigarrena. Zenbat heriotz, zenbat min!". Abertzale izan eta sentitzeagatik hil zituzten

herritarrek ekarri dituzte gogora berriz ere. "Gaixok errurik gabe hildako guztiak eta haien senideak!". Gerra bukatu eta gero, herria guztiz zatituta geratu zen. "Gu bezalakooi, herriko askok eta askok ez ziguten kasurik egiten kalean ikusita: horiei aita hil diete eta, badaezpada, begiratu ere ez! Herrikoak ziren txarrenak. Nazionalistek beraiek ere gu agurtzeari utzi egin zioten, beldurrez", gogoratu du Pakok. Ezinikusi asko sortu zuen gerrak, "askok gerra bengantza egiteko ere aprobeztatu zuen".



Gerra garaian, Amasan erreketean guardian egoten zen mutil-koadrila. Tartean dira Jose Luis Arana, Jose Mígel Zendoia, Juan Usandizaga, Gregorio Ezeiza, Mígel Larrarte, Joxe Mari Iraola, Arretxe, Tomax Urruzola, Joxe Aiastui, Juan Lizaso, On Jose Baztarrika, Juan Jose Pagola, Adrian Berasategi, Juan Sorrondegi, Joxe Amantegi, Benito Agirre, Patxi Begiristain eta Inazio Altuna

36ko Gerra zuzen-zuzenean bizitzea egokitu zitzairen gazte haiek, barru-barruan gordeta dituzte gertaera haiek guztiak. Hainbat adierazpen gogorregiak irudituko zaizkio agian irakurlearen bati; garai hartan bizitako minaren oihartzun biziak dira.



Jabier Berasaluze



Maritxu Gonzalez



Pello Iribar



Anjel Egiño



Pakita Lasa



Isabel Beraza



Pako Etxenike



Roberto Garate

## ...ETA HURRENGOAN ZER:

**G**ogorra eta zorrotza izan da heme-retzigarren zenbakia. Gogorra eta zorrotza izan baitzen 36ko Gerra. Ondorena, ordea, ez zen baregoa izan. Egoera haren berri ezagutuko dugu hogeigarren zenbakian; ihesaldiak, miseria, gosea, izurriteak... Ordura arte, irakurle!



## UTZIKO AL DIZKIGUZU ERRETRATU ZAHARRAK?

**A**zken aldizkaria besterik ez da falta 20 zenbakiko bildumarekin amaitzeko. Argitalpenarekin hasi ginetetik, erretratu zahar mordoia bildu dugu eta egitasmoari liburu mardul batekin eman nahi diogu amaiera. Liburuak Amasako eta Villabonako erretratu zaharrak bilduko ditu bereziki, baina narrazioak ere bere pisua izango du.

Ba al duzu etxean liburuan argitaratuta ikusi nahiko zenukeen argazki zaharrik? Hala bada, jar zaitez gurekin harremanetan. Karidade-enea etxean aurkituko gaituzue Zizurkilgo Bulandegi bidean.

Goizeko 10:00etatik 13:00era jasoko ditugu argazkiak. Etorri aurretik, dei ezazue mesedez 943 696 450 telefono zenbakira.

### ARGITARATZAILEAK



Amasa-Villabonako Udala



Manuel Larramendi Kultur B. azkuna

Argitaratzaileak: Manuel Larramendi Kultur Bazkuna, Amasa-Villabonako Udalaren dirulaguntzaz. Ekoizlea: Erroitz B.M. Zuzendaritza eta erredakzioa: Ainhoa Arozena. Maketazioa: Maddi Trutxuelo. Argazkiak: Xabi Ubeda, Erretratu zaharren liburu (Larramendi Bazkuna) eta artxibo ezberdinak. Inprimaketa: Sortu grafikak (Zizurkil). ISSN: 1698-7330. Lege gordailua: SS-1289/04. Tirada: 1.400 ale.

### EKOIZLEA



### BABESLEA



Eusko Jauriaritza KULTURA SAILA